

Excelências
Administrador do Município,
Presidente Fundação,
Magnifiku Reitor,
Fundadores UBTL,
Docentes,
no Universitáriu sira,

Uluk liu ha'u agradese ba Konvite ne'ebé Magnifiku Reitor ho Prezidenti Fundasaun **Leolaku Manufahi Riak/LELAMAR** haruka ba ha'u, atu mai partisipa iha serimónia orientasaun datoluk ba estudante foun sira, ne'ebé monu iha loron ida ne'e.

Ha'u haksolok tebes tanba iha Kosta Súl mós iha ona Universidade ida, ne'ebé bele fasilita foin sa'e sira husi Munisípiu sira iha Kosta Súl, atu hetan asesu ba edukasaun Ensinu Superior. Tanba ne'e ha'u apresia tebes ba iniciativa husi fundadór sira, ne'ebé harii ona Universidade Boaventura de Timor-Leste ka UBTL ida ne'e, parabéns ba ita bot sira!

Maluk sira hotu,

Investimentu iha Rekursu Umanu maka sei garantia futuru ba ita nia rai doben Timor-Leste. Tanba ne'e ho prezensa UBTL nian iha Kosta Súl ne'e, ha'u husu ba estudante sira atu aproveita didi'ak oportunidade ne'ebé Universidade ne'e oferece. Foin sa'e sira maka futuru ba nasaun nian,

tanba ne'e, atu nasaun bele iha futuru ne'ebé di'ak, foin sa'e sira tenke kapasita an didi'ak nune'e bele lori Timor-Leste ba futuru ida ne'ebé di'ak liu!

Timor-Leste presiza tebes Timor-oan sira ne'ebé iha matenek no koñesimentu iha area oin-oin atu desenvolve rai ida ne'e. Lakleur tan, iha tempu hirak oin mai, ita sei halo desentralizasaun, hodi fahe poder ezeutivu balun mai iha Munisípiu sira. Bainhira desentralizasaun ne'e la'o ona, maka munisípiu sira sei presiza ninia ema, feto ho mane, ne'ebé iha koñesimentu no matenek atu desenvolve sira nia munisípiu.

Ita nia futuru iha ita nia liman rasik, futuru ema ida nian depende ba nia an rasik, laos ema seluk. Ema seluk ka Inan-Aman fo'o deit dalan ka facilidade, atu uza ho diak ka lae depende ba ita ida-idak. Imi nia Inan-Aman fo'o apoio ba imi hodi kontinua eskola, tambá ne'e, labele husik liu deit apoio sira ne'e. Fundadores sira hari'i UBTL ho hanoin ida hodin halibur imi hotu iha ne'e hodi aprende. Atu aprende buat ruma diak ba futuru, depende imi ida-idak nia hakarak no aproveitamentu rasik. Tempu ida agora ba estudantes sira mak aprende no estuda hodi prepara-an ba futuru, atu sucesso ka lae depende ba imi ida-idak.

Estudante sira,

Ba estudante sira iha fakuldade Ekonomia, ha'u husu atu imi halo esforsu hodi aprende lisaun sira ne'ebé universidade oferece. Tanba hahú ohin no iha futuru, atu desenvolve imi ida-idak nia munisípiu, sei presiza

ekonomista ne'ebé di'ak atu halo, ka foti desizaun polítika ekonomia ne'ebé adekuadu, tuir kondisaun munisípiu nian.

Ba estudante sira ne'ebé estuda kona-ba siénsia Agrikultura, nasaun ida ne'e rai esperansa iha ita bot sira nia liman, atu imi bele desenvolve setór agrikultura, nu'udar setór produtivu ida ne'ebé sei fó rétoru ba ita nia rain. Ha'u husu ba imi atu estuda didi'ak, atu nune'e bainhira remata kursu iha UBTL, imi sei fila ba imi ida-idak nia munisípiu hodi kria kampu servisu ba imi nia an, liuhosi dalan sai agrikultór ne'ebé modernu no profisionál, ka sai agente ne'ebé lori mudansa modernu no inovativu, ba comunidade agrikultór sira iha imi nia hela fatin!

Ba kandidatu Enjeñeiru sivíl no informátika, aprende didi'ak ba iha fatin ida ne'e, tanba hanesan ho imi nia maluk sira husi fakuldade rua ne'ebé ha'u temi ona iha leten, imi mós sei hola papél importante iha konstrusaun estadu nian. Liuhosi imi nia partisipasaun ativu iha imi ida-idak nia munisípiu, maka imi sei kontribui ba desenvolvimentu iha ita nia rain. Ha'u husu atu imi estuda didi'ak nune'e iha futuru imi bele sai autór prinsipál iha projetu konstrusaun sira iha ita nia rain.

Ba estudante iha fakuldade Saúde nian, ha'u husu atu imi estuda makaas, aproveita didi'ak formasaun saúde nian iha UBTL

ida ne'e, tanba ita bot sira maka sei tau matan ba comunidade sira nia saude. Nasaun forte bainhira nia comunidade sira saudavel, tanba ne'e, dala ida tan

ha'u husu ba imi atu estuda makaas, imi nia papel sei importante tebetebes ba comunidade!

Ita hotu hatene katak Kosta Sul sei sai sentru ba indústriá petrolífera iha Timor-Leste, tanba ne'e dala ida tan, ha'u husu ba UBTL, atu halo esforsu hotu-hotu iha dezvoltamentu Rekursu Umanu nian, atu kontribui ba Timor-Leste nia mehi bot ida ne'e. Kosta Sul sai pontu sentral ba atividade petrolífera iha triángulu Timor-Leste-Australia no Indonézia.

Ho assinatura tratadu delimitasaun fronteira tasi Timor Leste ho Australia, iha loron 6 fulan Marsu 2018, mina ne'ebé eksplora husi companhia sira iha tasi Timor, ne'ebé durante ne'e fa'an ho Australia, depois de ratificação husi Parlamentu Nasionál Timor Leste ho Parlamentu Nasionál Australia, riku soin hirak ne'e, Timor Leste nian tomak. Reforsa tan ho sosa asaun/saham companhia Conoco Philips no Shell nian ho total 56,56%, ne'e garanti liu tan ba pipe line ka kadoras mina sei dada mai Beasu no fatin destilação mina iha Betano ne'e garantidu ona. Tuir planu tinan 2020 hahú konstrusaun no instalasaun, tinan 2025 mina komesa tama Beasu no Betano hahú halo destilação. Tamba ne'e mak hau husu ba jovem sira atu aproveita tempu ne'e ho diak hodi prepara-an liu husi estuda makás no halo atividades ne'ebé produtivu ba imi nia futuru rasik.

Atu remata, ha'u husu ba Magnifiku Reitór, Dosente sira, no ba estudante sira iha UBTL, atu hotu-hotu halo esforsu kaer ba motto UBTL nian ***"Haburas Siensia, Dezenvolve Nasaun"***, nune'e UBTL bele prodúz graduadu sira ne'ebé iha kualidade, matenek, no koñesimentu atu serbí ita nia rain. Dezenvolvimentu rekursu umanu maka xave no fatór importante ba Timor-Leste nia futuru, tanba ne'e, dala ida tan ha'u agradece no apresia ba inisiativa husi fundadór UBTL sira hotu.

Ikus liu, ha'u husu fila fali ba estudante sira atu estuda makaas, estuda ho badinas, no ha'u hato'o ha'u nia dezeju susesu ba imi hotu iha UBTL ida ne'e. No husu ba imi hadok-an husi hahalok krimi sira, tambá ida ne'e bele destrui ka estraga imi nia futuru.

Dezejo bom sucesso ba UBTL no Universitário sira. Parabens ba sucesso orientasaun ba dala tolu ida ne'e.

Obrigado barak.